

Protocol

dalla radunanza communal dils 11 da december 2025 ella halla polivalenta a Trin

- Il president communal Maurus Caffisch beneventa 141 persunas alla quarta radunanza communal digl onn 2025.
- Igl invit ei vegnius distribuius a termin. La gliesta da tractandas vegn approbada.
- Sco dumbravuschs vegnan las suandontas persunas eligidas: Mario Blumenthal, Simon Zeltner, Marino Bono, Martina Frischknecht ed Olivia Buonvicini (menadra dil biro electoral).

Tractandas:

1. Approbaziun dil preventiv 2025
2. Informaziun davart il plan da finanzas e d'investiziun 2026 – 2030
3. Determinaziun dil pei da taglia communal 2026
4. Entrada sin la damonda da reexaminar la decisiun "Transformaziun dil santeri da Trin"
5. Discussiun davart il sutpassadi Felsbach, credit fr. 980'000.-
6. Varia

1. Approbar il budget 2026

Il president communal introducescha la tractanda. Dils detagls dil preventiv hagi la populaziun saviu prender envesta sin la pagina-web e sin la canzlia. Las pli impurtontas cefras vegnien aunc ina gada explicadas alla radunanza communal actuala. El quen da gudogn e sperdita seigien expensas da ver 10.3 miu. francs ed in recav da rodund 10.1 miu. francs budgetai; quei munti in surpli d'expensas da ver 188'780.- francs.

Il recav fiscal – surtut las taglias sin las entradas e sin la facultad – sebasien sin schazetgs dall'associaziun dils uffecis communal da taglia e dall'administraziun cantunala da taglia. El sector dallas regalias e dallas concessiuns hagi ei dau in augment remarcabel. Quel seigi d'attribuir surtut al fatg che l'ovra electrica Pintrun vegni presentada per l'emprema ga cumpletamein ella contabilitad. Las indemnisaziuns seigien carschidas per rodund 170'000.- francs. Il motiv seigien las taxas da consum pli aultas per l'aua e l'aua piarsa. Il recav da transfer vegni preventivus cun entradas supplementaras da rodund 70'000.- francs. Quels resultien principalmein da contribuziuns da scola pli aultas da vart dil Cantun.

Ils cuosts da personal s'augmentien per rodund 120'000.- francs. Il mument dalla preparaziun dil preventiv hagian ins fatg quen cun ina cumpensaziun dalla carischia da 0.7 %. Actualmein seigi denton da quintar cun ina cumpensaziun dalla carischia da 0 %. Ina decisiun corrispudenta dalla Regenza seigi denton aunc pendent. La vischnaunca setegni en quei connex mintgamai vid las prescripziuns dalla Regenza. L'adattaziun dallas pagas dallas scolastas e dils scolasts tenor las valurs medias dalla Svizra Orientala seigi risguardada per l'emprema gada per igl entir onn. Ils cuosts materials ed ils cuosts da gestiun, cunzun en connex cun l'ovra electrica Pintrun, hagian ins budgetau cun in surpli d'expensas per ils cuosts da produenziun da rodund 700'000.- francs. Ils projects da manteniment currents che figureschien el preventiv seigien denter auter il rempar dil torrent a Bargis, il remplazzament d'armaturas d'aua, l'introducziun da zonas da tempo 30 el vitg sco era il remplazzament dall'illuminaziun dallas vias.

Las amortisaziuns seigien vegnidas budgetadas tenor la contabilitad d'investiziun a basa dallas prescripziuns da HRM2. Ils cuosts da transfer s'augmentien en cumparegliaziun cun il preventiv 2025 per rodund 100'000.- francs. Il motiv principal per quei augment seigi il svilup dils cuosts carschents el sector da sanadad ch'ei grevs da schazegiar.

Ils cuosts finanzials duessien tut en tut sesminuir. Il svilup dils tscheins possibiliteschi ina refinanziaziun fetg favoreivla. En cumparegliaziun cun il preventiv 2025 seigien plinavon las expensas da standard per il manteniment dallas immobilias ella facultad finanziaria vegnidas reducidas.

Las expensas d'investiziun previdas muntien a rodund 2.5 miu. francs. Da l'autra vart stettien entradas d'investiziun da ver 0.68 miu. francs, aschia ch'ei seresultien investiziuns nettas da rodund 1.9 miu. francs. Gia el preventiv 2025 seigi previu da remplazzar il transporter dils pumpiers. Muort munconza d'offertas ed in surpassament dils cuosts spitgai vegni il project lantschaus da niev igl onn 2026. La vischnaunca seigi vegnida alla conclusiun ch'ins stoppi cuvierer la scala exteriura sper la halla polivalenta. Cunzun ils dis da neiv ni ils dis cun temperaturas fetg bassas seigi la scala ina gronda resca da segirtad ed ins stoppi far lavurs da manteniment considerablas. Cun disfar la scala davos la casa da scola veglia daventi la scala exteriura dalla halla polivalenta aunc pli impurtanta. Plinavon seigi previu d'investir els suandonts projects: la sanaziun dalla Via Bot Fiena (secund tschancun) inclusiv la renovaziun da lingias d'aua e da canalisaziun sco era dall'illuminaziun dallas vias, la construcziun dil sutpassadi Felsbach, il remplazzament dil transporter dil luvratori communal, la transformaziun dil santeri sco era il secund e davos tschancun dil project per reparar diversas vias egl Uaul Grond.

Il president communal arva la runda da damondas e da discussiun.

Ina persuna presenta renda attent ch'il tscheins da locaziun per las immobilias da scola dil scalem superiur muntavi sur plirs onns 90'000.- francs e che quel seigi ussa dapi treis onns sin 98'000.- francs, quei che hagi probablamein da far cun l'indexaziun. Il tscheins da locaziun dil luvratori forestal resti denton tuttina e pari pia buca d'esser indexaus. Ins dueigi prever per il proxim termin pusseivel in'indexaziun sin la locaziun dil luvratori forestal.

Il president communal informescha ch'ins hagi concludiu in niev contract da scola cun la vischnaunca da Flem che determineschi in'indexaziun per la cumpart dils cuosts da locaziun. La vischnaunca sappi bugen examinar cun la proxima caschun in'adattaziun el contract da locaziun cun Flims Trin Forst.

Dalla populaziun vegn la damonda tgei ch'il post «material da biro» hagi da muntar enteifer las differentas specias d'uaul el preventiv forestal.

Il president communal informescha ch'ins hagi per part dau auters nums als contos cun introducir la nova software. Ei seigi tochen ussa buca dau en egl ch'il «material da biro» seigi buc adattaus per il preventiv forestal. Il num vegni adattaus.

Ina persuna presenta vul saver, nua ch'il project per las structuradas dil di seigi preventivaus e co il project s'avonzi.

Il president communal informescha ch'ins hagi preventivau per il project da pilot ina summa proforma da 9'000.- francs sut il post per la scola populara. Aschiditg ch'ins hagi buc in project concret sappien ins era buca preventivar ina summa precisa. Tut tenor il project avon maun sappi la suprastanza communal deliberar mieds finansials en atgna cumpetenza ni sutmetter il project ad ina radunanza communal. La gruppa da lavur installada seigi pil mument aunc vid elaborar ina proposta per mauns dalla suprastanza communal.

La suprastanza communal propona d'approbar il preventiv 2026. El vegn approbaus cun gronda maioritad e 3 abstenziuns.

2. Informaziun davart il plan da finanzas e d'investiziun 2026 – 2030

Il president communal informescha davart il plan da finanzas e d'investiziun 2026 – 2030. Il plan da finanzas detti ina survesta cumplessiva dallas finanzas dalla vischnaunca a media vosta. Ei setracti cheu d'in instrument da lavur per la suprastanza communal che stoppi buca vegnir approbaus dall'administraziun communal.

Da principi dueigi l'activitad d'investiziun dils proxims onns survir principalmein ad ina buna infrastruttura da basa. Las investiziuns nettas dueigien vegnir ulivadas sur ils onns e sche pusseivel vegnir finanziadas cun agens mieds. La tendenza actuala muossi denton ch'ina autofinanzaziun cumpleina vegni strusch ad esser pusseivla. La prognosa demuossi ina munconza da finanziaziun probabla ch'ins sappi buca financiar cumpleinamein cun agens mieds. Ei seigi perquei impurtant da tractar precautamein giavischs d'investiziun. Tuttina permetti il credit general existent da cuvierer bein ils basegns da capital. Ei detti certas malsegirtads che la vischnaunca sappi buca resolver sezza, mobein che dependien da facturs externs. Ins stoppi perquei observar cun quitau ils svilups per saver reagir spert en cass da basegns.

Dalla populaziun vegn la damonda pertgei ch'ils cuosts per cuvierer la scala davos la casa da scola cumparien el preventiv sut «formaziun»?

Il president communal informescha che la scala vegni duvrada surtut dalla scola e l'amortisaziun mondi perquei era sut quei post dil preventiv.

3. Determinaziun dil pei da taglia communal 2026

Il davos onns ha la vischnaunca saviu mantener ina situaziun finanziaria stabila. La suprastanza communal ei perschuada che ver 95 % dallas expensas san vegnir cuvretgas vinavon cun ils mieds finansials disponibels.

Il president communal arva la runda da damondas e da discussiun. Da quella vegn buca fatg diever.

La suprastanza communal propona da schar il pei da taglia per igl onn 2026 sin 95 % dalla taglia cantunala sempl. La proposta vegn approbada cun gronda maioritad e 2 abstenziuns.

4. Entrada sin la damonda da reexaminar la decisiun «Transformaziun dil santeri da Trin»

Il president communal introducescha la tractanda. Il project seigi vegnius tractandaus alla radunonza communal dils 19 da mars 2025 ed approbaus – sunter ina discussiun intensiva – cun 49 vuschs affirmativas e 43 vuschs negativas. Il 5 da zercladur 2025 hagi il comité d'iniziativa inoltrau l'iniziativa cun 239 suttascripziuns. La finamira da quella seigi da reexaminar la decisiun dil mars. Sinquei hagi la suprastanza communal sistiu il project tochen alla decisiun finala, senza ch'ei hagi dau tochen leu cuosts considerabels. Tenor art. 32 dalla constituziun communal sappi da principi mintga decisiun vegnir suttamessa ad ina reexaminaziun. Dapi la votaziun oriunda seigi aunc buca vargau in onn, aschia ch'ei drovi ina maioritad da 2/3 per entrar sin la damonda da reexaminaziun. Sche quella vegni approbada, vegni il project suttamess danovamein alla radunonza communal per la deliberaziun – probablamein il mars 2026. Tut las opziuns politicas sappien vegnir duvradas, inclusiv propostas da midada, renviament, approbaziun ni refusa. Sche la damonda da reexaminaziun vegni refusada, resti la decisiun oriunda dil mars 2025 en vigur e la suprastanza communal hagi vinavon l'incumbensa d'exequir il project.

Il president communal surdat il plaid al comité d'iniziativa.

Il comité informescha ch'ins hagi vuliu reexaminar la decisiun, perquei ch'ei detti mintgamai denter il messadi e la radunonza communal mo pauc temps per elaborar ina cunterproposta. La malcontentientscha ella populaziun seigi stada il motiv da lantschar l'iniziativa. Quella seigi vegnida annunziada gia baul: Il 8 da matg 2025 hagian ins entschiet a rimnar las suttascripziuns e gia il 19 da matg 2025 hagian ins saviu comunicar che l'iniziativa seigi reussida (cun sustegn da 10 % dallas votantas e dils votants). Las experientschas fatgas duront la rimnada da suttascripziuns muossien in grond sustegn dall'iniziativa, la quala ins hagi surdau ufficialmein alla vischnaunca il zercladur 2025. L'iniziativa proponi da reexaminar la decisiun per crear las premissas per midadas dil project: la sulada da betun duei buca remplazzar il prau, la sulada dalla via duei vegnir mantenida, denton sanada, la fossa comunabla duei vegnir concepida da niev ed engrondida. Ultra da quei seigi impurtont da risguardar la dignitad dil santeri: santeris seigien loghens da ruaus per defunctas e defuncts. Il loghens da sentupada planisai cunterfetschien a quellas pretensiuns, perquei ch'els pericliteschien il ruaus. Cun quei ch'il prau vegni nezegiaus mo darar, seigi ei buca giustificau da far investiziuns cumplessivas. L'iniziativa pretendi ina concepziun pli sempl e moderada, aschia sappien era ils cuosts vegnir reduci.

La suprastanza communal explichescha ch'il project seigi vegnius sviluppaus en stretga collaboraziun cun ina gruppa da lavur che secumponi da personas dalla pleiv, dalla vischnaunca politica e dall'union da dunnas. Quella hagi elaborau ina varianta favorisada dil project ed era integrau ella planisaziun il luvriers communal ch'ei responsabels per rumir la neiv e semtgar las fossas. Inputs da personas specialisadas dalla cussegliaziun da construcziun communal e dalla tgira da monuments seigien medemamein vegni risguardai. Dapi la votaziun oriunda il mars hagi quei dau neginas midadas materialas ni finansialas impurtontas che giustificassien ina reexaminaziun. Las pretensiuns centralas dall'iniziativa seigien integradas ella planisaziun: La fossa comunabla seigi vegnida concepida a moda detagliada, il access al santeri, surtut la via al sid, seigien vegni meglierai, il sistem da schuada vegni integrau igl emprem dalla vart dil nord dalla fossa comunabla ed amplifiaus ed optimaus dalla vart dil sid. Ei seigi era previu da realisar in plaz central per crear dapli spazi ch'ins sappi nezegiar era per occurrenz.

Il president communal arva la runda da discussiun e da damondas.

Ina persuna presenta pren il plaid e constatescha ch'ins hagi accentuau en connex cun il santeri ch'ei setracti d'in liug da dignitad. Igl anteriur president dalla pleiv evangelica hagi declarau lezza ga ch'ei seigi da principi imaginabel da duvrar il liug per occurrenzas ecclesiasticas generalas. Anja Felix, l'antieriura plevonessa, hagi naven dall'entschatta fatg part dalla gruppa da lavur. Ella eri dall'opiniun ch'ins sappi schaffir sin igl areal spazi per muments bials e digns ed hagi approbau il project.

Dalla populaziun vegn la damonda, schebein il diember sminuont da commembras e commembers dalla Basalgia giustificeschis quella investiziun.

Dalla populaziun vegn la damonda, schebein ei seigi pusseivel da prender envesta dil project.

Il president communal informescha che la populaziun sappi da tut temps prender envesta dil project ell'administraziun communal.

La suprastanza communal propona da buc entrar ella damonda da reexaminar la decisiun. Il comité d'iniziativa propona d'entrar ella damonda da reexaminar la decisiun.

Dalla radunonza vegn la proposta da far ina votaziun en scret. La proposta vegn approbada da pli che 10 votantas e votants – la votaziun vegn fatga en scret.

Il president communal damonda la radunonza communal, schebein ella vegli entrar ella damonda da reexaminar la decisiun.

cedels entrai:	141
vits:	2
nunvaleivels:	0
gie:	100
na:	39

ina maioritad da 2/3 ei contonschida cun 93 vuschs

Ina maioritad da 2/3 ei contonschida. Ella damonda da reexaminar la decisiun vegn entrau cun 100 vuschs.

5. Sutpassadi Felsbach, credit da 980'000.- francs

Il president communal introducescha la tractanda. La traversada per pedunzas e pedunzs sper la fermada Trin Mulin, Lag la Cresta, vegni taxada sco prigulusa. Cun engrondir la via seigi la situaziun sepigiurada: La distanza da traversada seigi ussa diesch enstagl da sis meters, il traffic pli sperts e traversar la via vegni resentiu sco riscau. La realisabladad d'in surpassadi per pedunzas e pedunzs hagian ins examinau cuort suenter la slargada dalla via. Il project seigi vegnius integraus el program d'aglomeraziun dalla Confederaziun. El decuors dil project hagian ins setschentau la damonda, schebein in surpassadi seigi propi la dretga sligiazion. Ord vesta pratica parevi quel buc optimal. Perquei hagian ins examinau supplementarmein la realisabladad d'in sutpassadi. Ei seigi semussau che quella sligiazion fussi buca bia pli cara, aschia ch'ins hagi persecitau vinavon quell'idea. Il president communal surdat il plaid al schef dil departament responsabel.

Il schef dil departament Marco Capatt presenta il project en detagl a maun dils plans horizontals. Dalla vart dalla spunda seigi previu da realisar ina preit da betun da sprizzar. Las fermadas dil bus vegnien buca construidas tenor ils basegns da persunas cun in impediment, cunquei che era la senda al Lag la Cresta seigi buc accessibla senza barrieras.

Il president communal arva la runda da damondas e da discussiun.

Dalla populaziun vegn la damonda, schebein ei detti ina garanzia che la fermada stoppi buca tuttina in di aunc vegnir adattada als basegns da persunas cun in impediment.

Il schef dil departament informescha ch'ins hagi fatg differents sclariments. Il Cantun applicheschi actualmeins il principi da proporziunalitad per pretender ina tala adattaziun. Quel seigi il mument buca daus per la fermada dil Lag la Cresta. Il Cantun garanteschi denton buca che la Confederaziun ni las dertgiras declarien quei principi dil Cantun buc in di sco nunvaleivels. La resca resti tier la vischnaunca.

Dalla populaziun vegn la damonda, sch'ins hagi examinau ina sdrema melna inclusiv inslas da segirtad sco alternativa al sutpassadi.

Il schef dil departament informescha ch'ei seigi buca lubiu da far ina sdrema melna sin ina via cun ina spertadad maximala dad 80 km/h e ch'il Cantun lubeschi buc ina reducziun sin 60 km/h sin quei tschancun dalla via.

Ina persuna dalla radunonza communal rendo attent al diever quotidian ed accentuescha la situaziun da traffic prigulosa. Ils cuosts ed il nez seigien giustificai, surtut en vesta dalla segirtad.

Dalla populaziun vegn la damonda, schebein in sutpassadi stoppi propi haver ina ladezia da treis meters. Cun slargar la via seigi ultra da quei la nischa da fermada per ils bus en direcziun da Cuera vegnida diminuida, aschia che negins autos sappien parcar leu pli. Tut tenor savessien ins duvrar il material da scavament per engrondir la fermada.

Il schef dil departament informescha ch'il sutpassadi dueigi tenor las normas vertentas haver ina ladezia da treis meters per evitar sentiments da stretgadat. Ins vegli denton examinar la damonda da slargar la fermada en direcziun da Cuera.

Dalla populaziun vegn la damonda co ins stoppi s'imaginar l'adattaziun dallas ulteriuras fermadas dil bus el vitg als basegns da persunas cun in impediment. Ins havessi stuiu inoltrar ils projects per la finanziaziun entochen la fin 2024. Las fermadas egl intschesch da habitar seigien pli impurtontas e perquei da tractar cun prioritad.

Il president communal informescha che las adattaziuns dallas ulteriuras fermadas dil bus seigien actualmein en preparaziun. Ins hagi inoltrau ils projects preliminaris a termin la fin 2024. In'occorrenza d'informaziun hagi giu liug. El rom dall'exposiziun da consultaziun hagi la vischnaunca saviu risguardar las propostas dalla populaziun. Era sch'igl interess dallas votantas e dils votants per projects ordeifer igl intschesch da habitar seigi pli pigns, seigi il project dil sutpassadi impurtonts per il diever dil Lag la Cresta e per augmentar l'attractivitat dil traffic public.

Dalla populaziun vegn la constataziun ch'il Cantun separticipeschi memia pauc per ina via cantunala. Sch'ei detti la pusseivladad da survegnir contribuziuns cantunalas pli aultas?

Il president communal informescha ch'ins hagi duas fontaunas da finanziaziun pusseivlas: il fond per il traffic plaun che cuvieri maximalmein 30 % dils cuosts e mieds dil program d'aglomeraziun che hagi gia garantiu ina cumpart per meter quadrat.

Dalla populaziun vegn la constataziun ch'ei fuss stau bien d'elaborar in project cumplexiv cun pusseivladads da parcar a Vallorca per mitigar la situaziun da parcadis entuorn il Lag la Cresta.

Il president communal informescha che la vischnaunca prioriseschi actualmein il concept da gestiun e da concepziun per Trin Vitg. Il concept respectiv per Trin Mulin vegni prius per mauns ils proxims onns.

Ina persuna presenta vul saver tgei plivaleta ch'il project hagi per l'entira populaziun da Trin. Ei stoppi dar in'otra pusseivladad pli favoreivla. Il project dueigi vegnir surluvraus aunc ina ga. Ultra da quei dueigi en cass d'in eventual engrondiment dil sutpassadi era la fermada dil bus vegnir optimada (protecziun encunter plievgia e sulegl).

Il schef dil departament confirmescha ch'ins seigi vid examinar, sch'ins vegli integrar el project in'adattaziun dalla fermada dil bus.

Ina persuna presenta vul saver, sch'ins hagi examinau l'idea da construir ina rampa enstagl d'ina scala. Ina rampa munti dameins lavurs da manteniment.

Il schef dil departament declara ch'ins hagi eligiu sapientivamein ina scala. Ina rampa caschunassi dapli material da scavament e lavurs da betun ed aschia pli aults cuosts.

Ina persuna presenta constatescha ch'ei fussi il pli sempel da renunziar dil tuttafatg alla fermada dil bus.

La suprastonza communal propona d'approbar il credit da 980'000.- francs. La proposta vegn acceptada cun 69 vuschs affirmativas e 56 vuschs negativas.

6. Varia

Il president communal informescha davart las radunonzas communalas che han liug igl onn 2026, numnadamein ils 11 da mars, 19 da zercladur e 10 da december.

Il president communal informescha che la grupp da lavur respectiva hagi terminau las lavurs per la revisiun costituziunala en connex cun l'iniziativa all'urna e l'iniziativa da trasparenza. Actualmeins elaboreschi la giurista engaschada dalla vischnaunca in sboz per mauns dalla suprastanza communal. En in proxim pass suondi la preexaminaziun entras il Cantun. Cun far silsunter in'occurrenza d'informaziun vegli la vischnaunca possibilizar ina vasta participaziun dalla populaziun cun l'exposiziun publica.

Dalla populaziun vegn la constataziun ch'il bus sin l'Alp Mora, organisaus dil management da Flem Laax Falera, seigi frequentaus fetg bein ord vesta turistica. Ils dis senza traffic da bus seigien mintgamai biaras persunas da viadi a pei ni cul velo. Ils dis ch'il bus carreschi vegni quel duvraus en media da ver 80 tochen 100 persunas a di. Ultra da quei carreschi quel mintg'onn ver 950 kilometers senza passagieras e passagiers ed ei maunchi indrezs sanitar (tualettas). La vischnaunca surprindi la garanzia da deficit.

L'uniun da traffic da Trin accentuescha per sclarir ils fatgs ch'ella organiseschi il menaschi dil bus sin l'Alp Mora. La finamira dalla purschida seigi explicitamein buca d'augmentar il diember da visitadras e visitaders. Ina gronda part da quellas e quels mondi a pei ni cun velos electricis sin l'Alp Mora. Tochen uss hagi l'uniun survegniu negins resuns negativs davart il menaschi. Ins seigi permanentamein vidlunder da meglierar las informaziuns, p.ex. davart l'aua, ils indrezs sanitar, etc.

Il president communal completescha che la vischnaunca hagi mess en vesta ina garanzia da deficit mo per igl emprem onn da menaschi. Da quella hagian ins denton buca fatg diever. Il menaschi dil bus sappi dapi lu vegnir realisau a moda ch'ils cuosts seigien curclai.

Dalla populaziun vegn la proposta d'adattar la lescha. El rom da quell'adattaziun dueigi la cumpetenza da dar lubientschas dalla suprastanza communal vegnir restrenschiada, aschia ch'il menaschi dil bus sin l'Alp Mora seigi buca cumprius en quella.

La proposta d'adattar la lescha vegn declarada sco buca relevonta, e quei cun 70 vuschs negativs e 39 vuschs affirmativas.

Ina persuna presenta vul saver, cura che la zona da tempo 30 vegni realisada en vischnaunca.

Il president communal informescha che las marcaziuns per signalisar ils plazs e las vias sappien vegnir fatgas mo duront dis cun temperaturas adattadas. La realisaziun vegni perquei spustada sin igl onn niev e seigi gia risguardada el preventiv.

Dalla populaziun vegn la damonda, schebein las piazzas da giug en vischnaunca restien aviartas sur ils meins d'unviern.

Il menader dil luvratori communal informescha che las piazzas da giug vegnien buca tgiradas duront quei temps e valien perquei sco serradas, ellas seigien denton tuttina accessiblas. Tgi che fetschi tuttina diever dad ellas, fetschi quei sin atgna resca.

Ina persuna presenta vul saver con lunsch che l'elaboraziun dallas structuradas dil di seigi avanzada.

La scheffa dil departament Silvia Capatt informescha che la grupp da lavur cumpetenta hagi proximamein ina seduta per approbar la proposta definitiva per mauns dalla suprastanza communal. Cun empremas informaziuns alla populaziun sappien ins quintar l'entschatta digl onn 2026.

A caschun dalla davosa radunonza communal digl onn vegn priu cumiau dallas scharschadas e dils scharschai che sortan da lur uffeci la fin 2025. Per lur lavur prestada e lur engaschi a favur dalla vischnaunca da Trin vegn admess ad ellas ed els in cordial engraziament.

Fin dalla radunonza: 22:30

Trin, ils 11 da december 2025

Il president communal:

L'actura:

Maurus Caflisch

Olivia Buonvicini